

**Integralni tekst<sup>1</sup>**

**Z A K O N**  
**O PROVOĐENJU ODLUKA KOMISIJE ZA ZAŠTITU NACIONALNIH SPOMENIKA**  
**USTANOVLJENE U SKLADU SA ANEKSOM 8. OPĆEG OKVIRNOG SPORAZUMA**  
**ZA MIR U BOSNI I HERCEGOVINI**

I – Predmet i svrha zakona

Član 1.

Ovaj zakon uređuje provođenje odluka Komisije za zaštitu nacionalnih spomenika, uspostavljene u skladu sa Aneksom 8. Općeg okvirnog sporazuma za mir u Bosni i Hercegovini (u daljem tekstu Komisija).

II – Definicije pojmova u smislu ovog zakona

Član 2.

“Nacionalni spomenik“ predstavlja dobro koje je Komisija proglasila nacionalnim spomenikom Bosne i Hercegovine u skladu sa članovima V i VI Aneksa 8. Općeg okvirnog sporazuma za mir u Bosni i Hercegovini (u daljem tekstu “Aneks 8.”) te dobra koja su upisana na “Privremenu listu nacionalnih spomenika“, koja se nalazi u prilogu, sve do donošenja konačne odluke Komisije u vezi sa njihovim statusom, a za šta ne postoji vremensko ograničenje te bez obzira na to da li je za dotično dobro podnesen zahtjev.

“Ministarstvo“ predstavlja Ministarstvo za urbanizam, stambeno-komunalne djelatnosti, građevinarstvo i ekologiju Republike Srpske.

“Rehabilitacija“ predstavlja vraćanje oštećenog ili uništenog dobra u stanje u kojem je to dobro bilo prije njegovog oštećenja ili uništenja, do razumno moguće mjere, uključujući i izgradnju nacionalnog spomenika na istom mjestu, u istom obliku i formi, istih dimenzija i od istog materijala kao što je bio prije rušenja, uz korištenje istih tehnologija građenja, kad god je to razumno moguće.

III – Zaštita dobara navedenih u Aneksu 8.

Član 3.

Podrazumijeva se da nacionalni spomenici automatski uživaju najviši stepen zaštite u zakonu Republike Srpske, bez potrebe za donošenjem daljih odluka, zakona,

---

<sup>1</sup> Ovaj integralni tekst sadrži osnovni tekst Zakona i sve njegove izmjene i dopune (“Službeni glasnik RS”, br. 9/02-Visoki predstavnik za BiH, 70/06 i 64/08). Integralni tekst se koristi samo za internu upotrebu i na njega se ne može pozvati prilikom službene upotrebe.

propisa ili drugog. Vlada Republike Srpske i sva gore spomenuta tijela su naročito odgovorni da osiguraju poduzimanje svih koraka da bi se ispunili zahtjevi iz člana V Aneksa 8.

#### IV – Postupak izdavanja odobrenja za rehabilitaciju nacionalnih spomenika

##### Član 4.

Odluku o izdavanju odobrenja za rehabilitaciju nacionalnih spomenika donosi Ministarstvo.

##### Član 5.

Uz zahtjev za izdavanje odobrenja za rehabilitaciju nacionalnog spomenika vlasnik je dužan priložiti:

- (a) izvod iz katastarskog plana,
- (b) dokaz o vlasništvu ili pravu korištenja zemljišta ili objekta,
- (c) historijski ili građevinski opis izvornog stanja objekta ili kompleksa sa postojećom arhitektonskom, fotografskom i drugom dokumentacijom,
- (d) opis sadašnjeg stanja objekta ili kompleksa,
- (e) projekat rehabilitacije objekta ili kompleksa,
- (f) saglasnost Republičkog zavoda za zaštitu kulturno-historijskog i prirodnog naslijeđa, ako izradu projekta ne vrši taj zavod i
- (g) izvještaj o tehničkoj kontroli projekta rehabilitacije.

##### Član 6.

U postupku izdavanja odobrenja u smislu prethodnog člana primjenjuju se odredbe Zakona o općem upravnom postupku, ukoliko ovim zakonom nije drugačije propisano.

##### Član 7.

Ukoliko su ispoštovani uvjeti iz članova 2. (3), 5. i 11. (2) ovog zakona, Ministarstvo izdaje odobrenje za rehabilitaciju nacionalnog spomenika u roku od 30 dana od podnošenja zahtjeva.

##### Član 8.

Odluke koje su u suprotnosti sa odredbama ovog zakona ništavne su.

##### Član 9.

Prostorni planovi izrađeni suprotno odredbama ovog zakona ne primjenjuju se na zaštićeni prostor nacionalnih spomenika.

## Član 10.

Projekat rehabilitacije koji se odnosi na potpuno uništeni nacionalni spomenik je glavni projekat i izrađuje ga pravno lice ovlašteno za izradu takve dokumentacije.

## V – Obavezna saradnja

### Član 11.

Republika Srpska, kroz svoja nadležna tijela, ulaže sve napore da poduzme odgovarajuće pravne, naučne, tehničke, administrativne i finansijske mjere neophodne za zaštitu, konzervaciju, prezentaciju i rehabilitaciju proglašanih nacionalnih spomenika, i suzdržava se od namjernog poduzimanja bilo kojih mjera koje mogu oštetiti takvo dobro.

Ministarstvo uzima u obzir sve relevantne nalaze, obrazloženja i odluke koje Komisija izdaje u skladu sa članom V (4) Aneksa 8.

### Član 12.

Tijela i institucije Republike Srpske saraduju sa Komisijom i sa nadležnim ministarstvima.

### Član 13.

Gradska i općinska tijela u Republici Srpskoj dostavit će ministarstvu sve zahtjeve za rehabilitaciju nacionalnih spomenika, u roku od 15 dana od dana stupanja ovog zakona na snagu.

## VI – Nadzor

### Član 14.

Nadzor nad provođenjem ovog zakona vrši Urbanističko-građevinska inspekcija na nivou Republike Srpske, u skladu sa ovlaštenjima utvrđenim u Zakonu o prostornom planiranju Republike Srpske.

## VII – Kaznene odredbe

### Član 15.

Odgovorno lice u upravnom tijelu ili instituciji koja je prekršila odredbe članova 4, 8, 12. i 13. ovog zakona za taj prekršaj kažnjava se novčanom kaznom u iznosu od 100 KM do 1500 KM. To ne isključuje primjenu ostalih novčanih ili drugih kazni za kršenje bilo koje odredbe ovog zakona, u skladu sa zakonima Republike Srpske.

## VIII – Prelazne i konačne odredbe

### Član 16.

Odredbe drugih zakona kojima se direktno ili indirektno uređuju pitanja u vezi sa zaštitom, konzervacijom, prezentacijom i rehabilitacijom nacionalnih spomenika ne primjenjuju se ukoliko su u suprotnosti sa ovim zakonom.

### Član 17.

Ukoliko je prije stupanja na snagu ovog zakona pred nadležnim tijelom pokrenut upravni postupak za izdavanje odobrenja za rehabilitaciju te do tog datuma nije donesena prvostepena odluka, ili je odluka poništena, ili je vraćena prvostepenom tijelu na ponovljeni postupak, postupak se nastavlja u skladu sa odredbama ovog zakona.

Ovaj zakon ni na koji način ne sprječava izdavanje odobrenja za rehabilitaciju niti poduzimanje mjera u skladu sa takvim odobrenjem, niti poduzimanje drugih mjera u skladu sa ovim zakonom ili sa Aneksom 8.

### Član 18.

Ovaj zakon stupa na snagu osmog dana od dana objavljivanja u “Službenom glasniku Republike Srpske”.